

die Junge vo de Alte Stainlemer



Binggis Fasnacht 2017

Sujet: **Hunde Kot statt Märtplatz Brot**

Wenn z Basel s Bättzytglöggli lüttet,
 waiss jeede grad, was das bedüttet:
 Jetz machen alli Lääde zue.
 Uff d Stadt leggt sich e Dooterue.
 E Hufte finde das dernääbe.
 Au d Tanja maint: „SoLand muess lääbe!“
 Bekifft und bsoffe sitzt sy aane
 und foot aa d Stadtbelääbig blaane.
 Sy hirnt. Doch s Resultat isch arg:
 „Für d Hünd bruuchts uff em Märt e Pargg!“
 E Schnapsidee!!! Denn stell dir voor,
 dä Pargg für d Hünd wurd wirgglig woor.
 Do drifft sich denn, was bällt und bysst,
 was zwüsche d Bsetzistai ain sch...nüfflet.
 Das finde d Hundebesitzer siess.
 Doch du findsch bruuni Würscht statt Gmies.
 Jä, sott dä Pargg emool entstoo,
 no wird d Entwigglig wyttergoo.
 D Springrytter göön uff d Claramatte.
 S gitt döört für d Gäul au grad gnueng Schatte.
 Denn aber muess me grösser dängge.
 Me darf sich nit uff d Dier beschrängge.
 Nai, s gitt doo nummen ai Besträäbe:
 Die Altstadt muess für alli lääbe!
 Zem Bispil gitts – s wäär zwoor verbotte –
 e Hufte Lüt, wo gärn ains motte.
 Für sälli könnt me uff em ganze
 Petersplatz Cannabis pflanze.
 S gääb Lääbe! Lüt vo nooch und färn
 käänte für s Ärnste no so gärn.
 Bim Münschter gääbs denn – do druff wart y –
 e Summer lang e Sand-Beach-Party.
 Im Münschter sälber hätts doch grad
 no Blatz für en Erläbnisbad.
 Für Skates und Scooters wärs famos,
 gäbs Rampe in der Freie Strooss.
 E däawääg – ych fänds nit dernääbe –
 käämt vor die lääre Lääde Lääbe.
 Mit Mountainbike dörftsch ganz verwääge
 der Rhysprung obenabefääge.
 Vom Club de Bâle wurd um fünf Egge
 e Golfplatz sich dur d Stadt erstregge.
 Sandbunker, Greens und Wassergrääbe
 wurde d Stadt enorm belääbe!
 Am Spaalebärg gäbs noo däm Blaen
 für d Jogger grad e Finnebaan.
 In d Rhygass kämt – und zwoor uff d Duur –
 e super Kunschtschnee-Langlaufspuur.
 Mit Hünd ellai ka me die alte
 Gasse nit lebändig gstalte.
 Drum isch au kai Idee dernääbe,
 zem unseri miedi Stadt z belääbe,
 bis Basel (doch das merggt me z spoot)
 im Sauglattismus undergoot.

D Ladäären-Uusstellig uff em Münschterplatz,
 d Waagen- und Requisiten-Uusstellig uff em Kasäärneplatz
 sinn vom Määntig znacht bis am Mittwoch demorge.

Drugg: Gremper AG



Als Bueb kunnsch nadüürlig zue de **Alte Stainlemer !**

Namme:

Vorname:

Strooss:

PLZ / Ort:

Delifoon: Joorgang:

Schigg die Aamäldig an Obmaa vo de Junge:
 Pascal Mutschler, Baumgartenweg 15, 4123 Allschwil oder lütt
 em doch aifach aa: Delifoon 076 589 17 53
 oder schigg en E-Mail an: p.mutschler@stainlemer.ch

oder kumm in unsere Käller go schnuppere
 am Samschdig 11. oder 18. März 2017
 zwüsche zwai und vieri am Noomidaag
 am Aubärg 2b (bi dr Heuwoog)
 Cliquekällerbeseichtigung und Apéro für alli Eltere
 oder mäld dy under: www.jungi-stainlemer.ch

die Junge vo de Alte Stainlemer



Jungi Garde Fasnacht 2017

Sujet: **K.O.bra**



Kuum isch d Menschhait am entstoo,
 foot sii aa mit ummeschloo.
 Aine brüüglet um e Frau,
 dr ander will die ebben au;
 ain will em andere sy Stamm
 und streggd en aabe zimmlig stramm;
 e jeede will dr Sterggschdi syy
 und merggd denn bi däm Wettkampf glyy,
 hesch s Muul z wyt uff, no gitts Verdruss
 und bletzlig aini böös uf d Nuss!



Spöter bi den alte Grieche
 sin denn d Boxer Siibesieche.
 Mit bludde Händ und voller Luscht
 knalle sii sich d Füscht uf d Bruscht.
 Sii bängle si sich wild um d Oore,
 bald sprützt s Bluet uus alle Poore,
 und dr Beschdi freut sich ganz
 vrgniegt über syy Siigerkranz.
 Är isch e gfyyrte Held uf Ärde,
 dörf Liebling vo de Götter wärde.



Au d Römer sin im Boxe fix,
 wäär numme nid dää Obelix!
 Äär spiilts de Römer richdyg fyys
 und schüddled sy grad rajewyys.
 Nur mir Schwyzer schiebe Lämmbe,
 denn bi uns gitts kai so Kämmbe.
 Was, e kain? in Basel unde
 hän mir en ächte Schwyzer gfunde,
 als ‚KOBRA‘ styggd - das isch e Ding -
 dr Arnold stramm für uns in Ring!



Im sy Rächdi isch e Wucht,
 s ergryfft e jeede Gegner d Flucht!
 Au dr Hogge tschätteret,
 wenn är ans Kiini schmätteret.
 Dr ‚Uppercut‘ deent dobblet scheen,
 fääle nochr e baar Zeen!
 Dr Lääberdräffer e Tortuur
 schlimmer als fünf Whisky-Suur.
 Grundsetzlig füülsch du dii drnoo,
 als sygysch untre Schnällzug koo.



Soo wird dr Arnold übermietig
 und macht dr Haye e Bitzli wietig.
 Doch dää maint numme kurz und bref,
 „Kobra, doo bin ych dr Scheff!“
 Die hätti scho no boxe welle,
 doch jetz ka si Radyysli zelle,
 und froggd vrzwyflet dr Gallina,
 häddsch mer nid e Caotina?
 Denn feschi Naarig liggd nümm dinne,
 so isch es halt, wenn andri gwinne...



D Kobra zieht sich, daas isch schlaue,
 gstuucht und gschunde zugg in Bau.
 Dr näggschdi Kampf losst uf sich warte
 und es wartet nid e Zarte,
 e Flaischkoloss quäält sich uf d Brädder
 (s wäär au dr Obelix nid fädde)
 und torggled richdygsloos dur d Sail,
 so richdyg findets keine gail,
 doch fir d Kobra heisst au doo:
 Yynestäche zämmeschloo!!

D Ladäärnen-Uusstellig uff em Münschterplatz,
 d Waagen- und Requisiten-Uusstellig uff em Kasäärneplatz
 sinn vom Määntig znacht bis am Mittwuch demorge.

Drugg: Gremper AG



Als Bueb kunnsch nadüürlig zue de **Alte Stainlemer !**

Namme:

Voornamme:

Strooss:

PLZ / Ort:

Delifoon: Joorgang:

Schigg die Aamäldig an Obmaa vo de Junge:
 Pascal Mutschler, Baumgartenweg 15, 4123 Allschwil oder lütt
 em doch aifach aa: Delifoon 076 589 17 53
 oder schigg en E-Mail an: p.mutschler@stainlemer.ch

oder kumm in unsere Käller go schnuppere
 am Samschdig 11. oder 18. März 2017
 zwüsche zwai und vieri am Noomidaag
 am Aubärg 2b (bi dr Heuwoog)
 Cliquekällerbesichtigung und Apéro für alli Eltere
 oder mäld dy under: www.jungi-stainlemer.ch